

Kekuasaan, kekayaan hanya nikmat sementara

Syukur adalah tanda berterima kasih kepada Allah SWT atas kurniaan kepada hamba-Nya dan kerana itulah tiada orang yang bersyukur kepada orang lain melainkan kepada Allah SWT saja. Syukur juga sebagai pujian dan ingatan yang direalisasikan dengan mengerjakan suruhan serta menjauhi larangan Allah SWT.

Melalui hati, kita bersyukur dengan mengakui dan meyakini sepenuhnya segala nikmat diperoleh adalah daripada Allah SWT, bukan kerana nasib baik atau secara kebetulan. Sesungguhnya nikmat Allah SWT tidak terhitung walaupun manusia sering kali

lupa bersyukur.

Limpahan rahmat dan kesenangan hidup dikecapi hari ini adalah kerana kasih sayang Allah SWT kepada setiap hamba dan makhluk yang dicipta. Selagi ada hamba yang menyebut nama-Nya, selagi itulah kita akan terus mengecapi nikmat yang ada pada hari ini.

Mujur dalam era kemerosotan akhlak yang melanda seiring dengan kelemahan ekonomi dunia hari ini, umat Islam di negara ini masih terus mengingati dan bersyukur kepada Allah SWT.

Allah SWT berfirman yang bermaksud: *“Dan jika kamu menghitung nikmat Allah yang dilimpahkan-Nya*

kepada kamu, tiadalah kamu akan dapat menghitungnya satu persatu, sesungguhnya Allah Maha Pengampun lagi Maha Mengasihani.” (Surah An-Nahl, ayat 18)

Sungguhpun begitu, jika ditakdirkan suatu hari nanti tiada lagi orang yang bersyukur, pasti akan ada balasannya terhadap seluruh umat manusia kerana al-Quran telah memberi peringatan seperti mana yang pernah berlaku kepada umat terdahulu.

Iktibar kemusnahan Kabilah Saba’

Antaranya kisah Kabilah Saba’, yang dirakamkan al-Quran yang bermaksud: *“Maka kemakmuran dan kemudahan itu menjadikan*

mereka sombong dan kufur lalu berkata: Wahai Tuhan kami, jauhkanlah jarak perjalanan kami di antara sebuah bandar dengan yang lain, dan mereka berlaku zalim kepada diri mereka sendiri, lalu Kami jadikan mereka buah mulut orang ramai, serta Kami pecah-belahkan mereka berkecai-kecai. Sesungguhnya kisah mereka itu mengandung tanda-tanda yang besar pengajarannya bagi tiap-tiap seorang Mukmin yang sentiasa bersikap sabar lagi sentiasa bersyukur.” (Surah Saba’, ayat 19)

Bencana diturunkan Allah SWT sebagai peringatan terhadap perbuatan sombong dan sikap manusia yang tidak taat perintah Allah SWT serta lupa akan

kebesaran-Nya yang berkuasa terhadap semua penghuni langit dan bumi.

Ia juga sebagai iktibar terhadap orang yang berfikir, bahawa segala kekuasaan dan kekayaan di dunia ini adalah sementara sifatnya dan bila-bila masa saja boleh diambil kembali oleh pemiliknya jika nikmat itu tidak dipergunakan sebaik-baiknya.

Allah SWT berfirman yang bermaksud: *“Dan ingatlah tatkala Tuhan kamu memberitahu, demi sesungguhnya jika kamu bersyukur nescaya Aku akan tambah nikmatKu kepada kamu dan demi sesungguhnya, jika kamu kufur ingkar sesungguhnya azabKu amatlah keras.”* (Surah Ibrahim, ayat 7)